

閒中話上冊

第一輯

高等人

昔有一身子極胖大之某教官。頗留心新學。講究改良。聞新到學憲。亦極講新學。初聞見。稱學憲爲高等人。學憲大怒。以爲有心侮己。某教官卽逡巡謝曰。高等人明見。晚生以爲中國幾千年來。連用字都多欠穩切。極應改良。故如今大學已改爲高等學。緣學問之道。祇有高等階級。並無所謂闊大者。卽如目前。憲臺身子。比晚生身子並不大。不過憲臺官階。比晚生官階高一等耳。故對憲臺。不稱大人而稱高等人。

婦人三變

婦女少時。與父不若與母之親。旣嫁與夫親。一變也。中年與夫不若與兒女親。二變也。兒長娶婦。則與女親。而與子若婦漸殺其親矣。三變也。

馬路

有某省某中丞。奉旨辦新政。聞西洋有馬路。卽欲仿照舉辦。然又聞外洋街道寬闊。中築馬路。兩邊以石路廂之。以便徒步行走。今省城民間街道狹隘。礙難開闢。後聞南京武昌。業經舉行。民亦稱便。遂決意辦馬路。既成。又在上海定購洋式馬車。出門拜客。皆乘馬車。不用肩輿。亦覺甚適意焉。一日。有某道臺之子。在馬路上馳馬。忽於人叢中衝倒一老嫗。幾斃命。行路人皆爲不平。道臺之子停馬鞭。指而罵曰。撫臺築此路。本要給馬走。故不叫作人路。而叫作馬路。你們混帳百姓。敢占了馬路。我不送你到警察局懲辦。已算你們造化。還敢同我理論呢。有一鄉人應曰。哎。噲。大少爺。如此說來。如今中國惟有官同馬有路走。我們百姓都沒有路走了。後某中丞得聞此事。遂卽停辦馬路。並不坐馬車出門拜客。仍乘肩輿。韋蘇州詩云。自慚居處崇。未睹斯民康。某中丞亦可謂難得矣。

京師古蹟

京師古蹟中最著者。齊化門外東嶽廟月臺東首。有遼教碑。爲趙孟頫書。字體完好。沙窩門外東南里許。有架松。枝長。以木架之。數以百計。其蔭可二畝許。蒼翠可挹。彰儀門

大街萬豐糧店有古槐樹。質僅存其半。蒼翠依然。西單牌樓北某銅鋪。亦有槐樹一株。半在牆內。高出屋頂。樹身中尙含一大石。亦數百年物也。左安門外東南三里許。有十里河。每歲五月十三。六月二十四日。游人甚多。榆樹林在南下窪。繡綺橋在海甸。正西六里許。天甯寺在彰義門外西北里許。寺中有大銅佛像及石塔。相傳係晉朝物。清雅可逛。或云。該寺石塔無日影。亦異事也。廣安門外南二里許。有南河泡。四面皆水。中有陸地。構屋數間。長松細柳。左右圍列。幽蔭非常。夏日都人多宴會於此。推窗遠視。湖水清漪。荷花蕩漾。壁間題句。多擬之爲西湖。良有以也。近年修築鐵道。將湖隔斷。水面既小。游人亦稀。無復當時車水馬龍之盛矣。

西湖改裝

杭州之有西湖。猶人之有眉目也。語本白珽西湖賦。近則湖上水田。半爲買胡別業。金銀氈毳之氣逼人。未免湖山失色。有人改東坡語曰。欲把西湖比西子。而今西子改西裝。

蘇克拉第臨刑之名言

蘇克拉第爲希臘大儒。歐人崇拜之。不啻東方之孔子。後爲人所陷害。幽於縲紲。臨刑監吏脫其械。將送之於刑場。蘇克拉第坐於衆犯人中。以手磨擦腳上所受之械痕。覺苦痛退而快樂生。乃曰。快樂與痛苦爲輪番繼至之物。二者不能獨有。亦不能獨無。

尤侗逸事（二）

滿清開國時。達哈嘛與有功焉。厥後專權放恣。輿論譁然。聖祖恒優容之。又滿洲親王貝勒。都喜唱戲。某旦供奉掖庭。交通宦寺。爲人賄買官缺。尤侗病焉。因作聯曰。『世界小梨園。率帝王師相爲傀儡。二十四史。演成一部傳奇。』佛門大養濟。收鰥寡孤獨爲丘尼。億萬千人。遍受十方供給。』聯聞於聖祖。召侗入大內。詢以出處。侗曰。梨園小天地。虞長孺語也。佛門者。朝廷之養濟院。陳眉公語也。上默然。

尤侗逸事（二）

尤感於女室。搆消渴疾。經年不癒。仁廟時爲皇世子。命內豎饋藥餌焉。尤作啓謝之曰。臣風月膏肓。煙花痼疾。同馬卿之消渴。比盧子之幽憂。忽啓文魚。如逢扁鵲。贈之芍藥。投我木瓜。紫蘇與白芷同香。黃菊共紅花相映。猥云小草。錫以上方。月宮桂杵。竊是姮